

Empleado ehemplar, Michelle Roos, ta celebra 45 aña den servicio di biblioteca

Na augustus 2025, Michelle Roos, a cumpli 45 aña di servicio, un bunita logro y ta hacie tambe e profesional cu mas tanto aña di servicio trahando na Biblioteca Nacional Aruba.

Pa mas cu cuatro decada Michelle a traha na biblioteca. El a cuminsa como Balie medewerker y pa hopi aña caba ta hefe di departamento di Catalogo. Su conocimiento, liderazgo y compromiso pa excelencia sigur a haci un diferencia na Biblioteca Nacional Aruba, inspirando no solamente su coleganan di su departamento, pero tambe di e otro departamentonan. Michelle su pasion pa lesa y preserva conocimiento ta re-



marcabel. Henter biblioteca ta di fiesta, no ta solamente e 45 añanan ta conta, pero su sabiduria y dedicacion a caracteriza su carera profesional.

Na 1980, Michelle Roos, un hoben cu soño y aspiracion a drenta servicio di Gobierno Insular, pa bay traha na Biblioteca Publico Aruba. E tempo ey biblioteca ta

situa na Wilhelminastraat (edificio unda actualmente ta Algemene Rekenkamer). Despues di dos aña trahando Sra. Roos ta experencia mudamento di biblioteca pa otro localidad. Dia prome di september 1982, pa 6'or di atardi, ta habri oficialmente e biblioteca nobo na George Madurostraat 13. E padvindernan ta hisa bandera durante e inauguracion di e edificio actual di Biblioteca Publico. Dia 3 di maart 1986, S.E. Gobernador di Aruba, Sr. F.B. Tromp a batista Biblioteca Publico Aruba comento cu e nomber nobo Biblioteca Nacional Aruba. Biblioteca Nacional Aruba a celebra 75 aña di 'Trabou di biblioteca na Aruba' y nan ta orguyoso pa wak bek riba hopi desaroyo, hopi proyecto pa stimula lesamento, hopi



proyecto pa duna acceso na informacion pa e comunidad di Aruba y tambe e comunidad internacional. Cu hopi

animo Michelle y su coleganan ta sigui sirbi nos comunidad.

Aruba One Happy Island Lions Club

ta gradici un y tur:

Proyecto Back 2 School 2025 – un gran exito!



Aruba One Happy Island Lions Club a logra un biha mas ta completa cu gran orguyo su programa Back 2 School, treciendo sonrisa y oportunidad pa muchanan di famia cu ta den necesidad.

Danki na e apoyo increibel di nos comunidad, comerciantenan local y amigonan Lions, nos a logra yuda mas cu 50 mucha cu:

- Tas di scol yena cu material escolar – schrift, pen, potlood, gum, liniaal, slijper, stift, highlighter, map y hopi mas.

- Uniform escolar nobo.

Miembronan di One Happy Island Lions Club a prepara y entrega e tasnan di scol cu hopi alegria, y asina yuda contribui cu muchanan ta cuminsa e aña escolar cla

pa siña y bon ekipa pa logra exito.

Un DANKI GRANDI na tur esnan cu a yuda y contribui na e proyecto aki. Hunto nos ta haci un diferencia den bida di nos hubentud y ta traha pa un futuro mas briyante pa Aruba!

Relaciona cu peticion cu a keda drenta cerca nos organisacion, e fin di siman aki miembronan di One Happy Island Lions Club lo ta un bes mas na Pricesmart pa recauda fondo pa e muchanan cu ainda tin mester sea tas, uniform y material escolar. Pasa y haci bo donacion of swipe. Esnan cu ta desea di haci un donacion por haci esaki riba nos cuenta Aruba Bank – Fundacion One Happy Island Lions Club number di cuenta 6005880190, cu e anotacion Proyecto Back 2 School 2025.

Aruba Bank ta celebra 100 aña cu un donacion di AWG 100,000 na Ban Uni Man Pa Cria Nos Muchanan



Den celebracion di su 100 aniversario, Aruba Bank a anuncia un donacion di AWG 100,000 na Ban Uni Man Pa Cria Nos Muchanan, den cuadro di su 100 Years Legacy Project.

E fundacion, cu ta celebra su 24 aña di servicio, a haci un gran aporte durante decada pa duna un desayuno na miles di mucha riba nos isla. Pa marca e momento special, nan ta lansa un programa nobo cu ta introduci fruta y berdura den un manera creativo den snacks

y cuminda gusta pa mucha, manera “fruit cups”, “yogurt”, “muffins” y “nutricion bars”.

Sharon Fränkel, Managing Director di Aruba Bank, a splica durante e anuncio oficial; “E donacion aki ta mas cu un aporte financiero. E ta un inversion den futuro di Aruba, den salud, educacion y bienestar di nos muchanan.”

Cu e apoyo di Aruba Bank e programa lo segura un generacion mas saludabel.

